

vnd brüchig ist/also das es auch alle met  
tal/ dar vnder es gemengt wird/ vnars  
tig vnd brüchig macht.

Item/ ein teil des zwitter wird geboze  
ynn dem flies/ wie ictzund oben berürt ist  
vō dem gold/ das ynn dem flies gewirckt  
wird/ vnd wird etlichs gewaschen/ gros  
körnig/ den schorlin gleich/ vñ darus wi  
rd dz schönste vñ beste zin/ dz mā nennet  
saiphen zyn/ den seine materie wird gar  
reyn geleutert/ vñ durch die eigenschafft  
der stad geadelt/ Auch wird etlicher zyn  
stein gewirkt yn den bergen/ vñ gefundē  
gāghafftig/ der selbig wird besser vñ bes  
ser geacht/ nach dem er ferner vō den Eys  
gengen gefunden wird / vñ weniger mit  
dem Eyswerck vermischt/ Besondern mit  
gedichtem vñ kupperigem Eys / der gar  
schwerlich vō dem zinstein k̄a gescheydē  
werden. Sōdern d̄ taube Eys ist dem zyn  
stein nit also gar schedlich/ den durch die  
scherpffe des feners wirdt er geleichtert  
vñ geasschert/ also dz er auff den test mit  
dem wasser vō dem zinstein hinweg wei  
cht. Auch wird der zwitter oder zinsteyn  
ein teil gefunden yn eynē geschut nestig /  
vñ nicht gāghafftig auff den berg/ diser